

欽定剿平粵匪方略

欽定勦平粵匪方略卷五十三 癸丑年

八月初十日

壬午

郭夢齡奏言探聞賊匪於初五

日由絳縣竄至曲沃縣境偏近平陽該府城內  
僅存兵二百餘名業已閉城防守雖據探報郝  
光甲由澤州翻山馳赴垣曲絳縣一帶迎勦勝  
保由濟源尾追乃賊匪已竄過絳縣則兩路官  
兵均已落後平陽爲省城保障若一有失全晉

震動現在撫臣仍駐陽城臣雖疊次飛請飭調  
總兵烏勒欣泰迅帶弁兵折回平陽堵截此時  
已趕不及曲沃距省僅七百里不可不豫爲嚴  
防已商同前太僕寺少卿徐繼畚暨衆紳士稽  
察奸細並續練壯勇以資守禦一面稟催撫臣  
嚴飭帶兵官弁迅速迎勦以遏賊竄省垣之路

乞

飭下河北統兵各大員親帶重兵星馳來晉應援奏入  
上命軍機大臣傳諭哈芬郭夢齡曰賊匪由豫竄入垣  
曲復由絳縣竄至曲沃逼近平陽該府爲省城保障  
城內存兵僅二百餘名實形單弱著哈芬迅卽統帶  
弁兵兼程馳赴扼要地方迎勦杜賊北竄之路現在  
勝保善祿等統領大兵分路緊追郝光甲由澤州翻  
山迎勦該地方文武及紳民人等如能於賊過處所

登陴固守各村莊皆團練自固則賊匪前無可掠後  
有追兵當不難立就殄滅著哈芬郭夢齡卽行剴切  
曉諭各屬城鄉紳士商民務宜安靜固守自相保衛  
並嚴飭曲沃及平陽城內文武兵民同心守禦以待  
援兵太原省城卽責成郭夢齡會同徐繼畬與同城  
官紳兵民人等密爲防範嚴查奸宄總以鎮靜安定  
人心爲要

上又命軍機大臣傳諭訥爾經額曰昨因賊匪竄入垣  
曲諭令訥爾經額派兵前往截擊刻下曲沃被擾亟  
須援應已諭令勝保善祿迅速督兵進剿著訥爾經  
額卽飭官兵趕緊翻山前進合力攻擊正定近界山  
西並著迅派將弁帶兵由獲鹿一帶入山往援可期  
速到該大臣卽酌量調撥移遠就近毋稍延誤直隸  
各處防守事宜仍著該大臣妥籌布置前調之盛京

吉林官兵四千名已令暫停現在軍務未竣直隸地方緊要應如何擇要防勦之處並著該大臣相機調遣

上又命軍機大臣傳諭勝保善祿曰賊竄曲沃逼近平陽關繫晉省全局若令其沿途搶掠裹脅踞險負隅或又築壘掘濠施其故智攻勦更覺費力勝保善祿等分路緊追諒不至稍有遲緩郝光甲由澤州翻山

迎擊不知現抵何處著勝保統籌全局何路可以設  
伏何路可以迎擊何處官兵可以就近調撥酌量妥  
速布置務須設法繞出賊前合力夾擊萬不可任賊  
紛竄致有蔓延前曾諭令托明阿統兵馳往夾攻此  
時諒亦行抵晉境其應如何扼要堵截之處並著勝  
保隨時知照辦理

十一日

癸未

訥爾經額恩華奏言懷慶餘匪潰敗



西竄固已萬分窮蹙第未燼餘灰必應悉數撲滅臣恩華當於七月二十九日派協領台祿佐領巴揚阿帶領馬隊兵二百名跟蹤追勦復派副都統托雲保帶領馬隊兵五百名接續前進嗣又派馬隊兵四百名攜帶米糧送往接濟並資協勦八月初一初二等日又令總兵郝光甲帶兵二千五百名總兵烏勒欣泰帶兵一千五

百名翻山截擊並派總兵董占元帶兵八百名  
爲托雲保接應茲據托雲保函稱初一日行抵  
濟源初二日督兵入山沿途殺賊數十人初三  
日行至封門口有踞匪列礮抗拒我兵上前捉  
拏該逆正欲開礮馬隊已疾驅前進一擁而過  
該逆蒼黃失措均被我兵擒斬隨進山搜捕見  
賊匪百數十人潛伏山溝我兵奮勇轟擊斃賊

大半奪獲器械多件並生擒十餘名訊稱前行  
賊匪約已到邵原關山路險峻晝夜跣足狂奔  
無不力竭足腫十分狼狽托雲保於訊明後盡  
行正法仍卽督兵追擊等情查邵原關迤西卽  
天檀山爲入晉之路臣訥爾經額屢經咨會山  
西撫臣哈芬嚴防當已派兵堵截不至任其關  
入伏思該逆圍攻懷慶時米糧缺乏臣恩華早

已防其竄越因東南北三面均有軍營惟府城  
迤西較爲空虛是以咨商托明阿就近撥兵防  
勦准托明阿咨覆商同勝保善祿將副都統雙  
成所帶馬隊兵五百名並善祿所帶兵內分撥  
六百五十名一併交雙成統帶前往府西擇要  
安營以便夾攻嗣未據雙成將何處安營何日  
到防咨報究竟該逆潰竄之際雙成係在何處

紮營因何並不攔截現在飭查覈辦 臣訥爾經額現仍暫駐清化以資鎮撫 臣恩華卽移營濟源作爲後路接應務期掃淨餘氛

訥爾經額又奏言 臣接准山西撫 臣哈芬咨稱賊已翻山擁入垣曲隘口請速派官兵二三千名馳赴垣曲一帶進剿 臣查總兵郝光甲烏勒欣泰已帶兵四千名翻山前往與托雲保等合

力夾擊茲臣又續派天津通永宣化並山西兵  
共一千三百名派委副將孔廣順統帶取道攔  
車口由小路直赴山西陽城該逆如由垣曲北  
竄陽城係屬最要之路該副將到彼探明賊蹤  
即可會同郝光甲等併力截勦奏入

上命軍機大臣傳諭訥爾經額恩華曰前因懷慶攻勦  
賊匪西北空虛慮其潰圍奔竄早經諭令訥爾經額

等撥兵堵截追該郡解圍據奏餘匪西竄復諭令派兵迅往追剿茲據哈芬郭夢齡等先後奏稱賊匪竄入垣曲縣城旋擾曲沃逼近平陽如果該大臣等布置迅速周密何至任其奔突現雖撥兵追剿不過於封門口小有斬擒其大股賊匪竄入晉省者爲數已屬不少勝保此時想已由濟源追賊前進而郝光甲等翻山由陽城進剿之兵恐已落後該大臣等先後

所派馬步隊各兵現在追至何處是否與勝保等兵  
會合晉省存兵甚少惟有嚴飭諸軍迅速追捕毋令  
待援不至以致失事恩華現擬移營濟源以爲後路  
聲援恐賊蹤尙遠仍屬無濟著卽相機前進毋稍延  
誤晉省爲畿輔屏蔽處處壤地毗連關繫甚重若各  
路追兵及早趕到尙可卽時撲滅爲亡羊補牢之計  
據奏前派雙成防守西路何以不令郝光甲前往協



防哈芬旣以晉省兵單賊數甚多爲辭該大臣等又  
以西路竄出事後歸咎他人爲解總之賊匪由豫竄  
晉兩省督兵大員均難辭咎若再遷延推諉致令賊  
匪踞險負嵎餘燼復熾咎將誰執朕賞功罰罪一秉  
至公調度有方固不吝特加懋賞儻玩延貽誤亦豈  
能不執法從事耶懍之

上又命軍機大臣傳諭勝保善祿曰據訥爾經額恩華

奏餘匪潰竄入山派兵追剿所有派出之兵現已行抵何處與勝保等兵是否會合其副將孔廣順所帶官兵誦爾經額飭令取道攔車口直赴陽城此時賊匪已竄至曲沃偏近平陽關繫晉省大局勝保與善祿西凌阿等務須迅速追剿以馬隊繞出賊前遏其北竄斷勿任賊狂奔肆行搶掠裹脅又成滋蔓之勢誦爾經額所派官兵前已有旨均歸勝保調遣著卽

嚴催速進尾追已屬落後若再遷延觀望餘匪何時  
翦除晉省爲畿輔屏藩人民富庶斷不可再致蹂躪  
至直隸正定亦太行之要隘已諭令訥爾經額派兵  
由獲鹿一帶入山以爲太原後路接應勝保等著卽  
通籌全局迅掃妖氛以副朕望

上又命軍機大臣傳諭哈芬郭夢齡曰昨因賊竄曲沃  
諭令哈芬兼程馳往扼剿本日據訥爾經額等奏派

令副都統托雲保等入山勦賊探知該匪於初三日已由封門口直趨邵原關先會咨會該撫派兵堵截當不至任其闖入等語昨據該撫奏稱賊數尙多晉省兵單固係實情何以一經賊匪竄至並未聞如何接仗而該撫所派防守垣曲之道員張錫蕃等何以並無稟報顯係見賊卽逃著卽查明叅奏現在賊已偏近平陽該撫由陽城鳳臺一路前進已恐落後總

兵烏勒欣泰是否先抵平陽其府縣文武如何防守  
若再似張錫蕃等之遇賊卽潰勢將何所底止但能  
固守城池則各路援兵齊至何難一鼓殲除該省民  
力富厚且爲畿輔屏蕃哈芬職在守土責無旁貸訥  
爾經額先後所派馬步隊官兵計已陸續追及勝保  
與善祿西渡阿分路追擊想亦緊躡賊蹤其郝光甲  
等翻山由陽城進勦之兵尙恐落後必須飛催前進

毋任觀望該撫卽遵昨降諭旨迅速馳赴平陽一帶扼要迎擊此股匪數尙多如稍遲延致賊分竄汾霍之間則省城情形益形喫重該撫其能當此重咎耶

十二日

甲申

舒興阿奏言據澠池縣知縣胡廷弼

稟稱懷慶西竄賊匪已至山西垣曲縣現在南岸緊急等情查垣曲爲山西扼要門戶撫臣哈芬現已撥兵防堵特恐兵數尙單難期得力自

應迅速撥兵前往協勦惟臣所帶陝甘官兵先  
已令總兵桂齡帶領一千五百餘名前往河南  
府相機進勦臣行營未經起程之後起官兵僅  
有七百餘名不敷分撥查有前經奏明移往觀  
音堂駐紮之涼莊滿兵五百名尙未起程隨令  
副都統綿洵統帶卽於初七日起程從會興鎮  
過河由茅津渡前進臣先訪得垣曲縣迤西之

橫嶺關地勢險峻堵剿較爲得力已囑綿洵馳往該處迎頭截擊現在賊旣西竄河南府附近情形較前稍緩孟津渡口已有署副將珠克登帶領陝甘官兵一千名並副將錫普常阿撥兵二百名及署河南府李潔所帶兵勇似敷防剿此時陝州一帶又覺喫重查山西平陸縣與陝州僅隔一河茅津渡與會興鎮口岸相對其濟



源垣曲二縣對岸卽係陝州所屬之新安澠池  
二縣現在賊旣竄至垣曲此數處均應駐兵嚴  
防以杜竄越所有總兵桂齡帶赴河南府駐紮  
之陝甘兵一千五百名自應移緩就急調回陝  
州以資防勦現擬以漢中兵五百名分撥新安  
澠池擇要防堵其西甯河州官兵一千名卽令  
桂齡帶領折回聽候調撥 臣仍暫駐陝州居中

調度以期南北兼顧儻賊勢尙熾兵力較單  
臣  
隨時統帶官兵馳往迎勦迅掃逆氛奏入

上命軍機大臣傳諭舒興阿曰前因賊竄垣曲當諭令  
該督派委鎮將大員迅速帶兵馳往應援連日據晉  
省奏報該匪於初五日由絳縣竄至曲沃逼近平陽  
而太原防兵亦甚單弱該省爲京師屏蔽關係甚重  
勝保亦與善祿西凌阿於初二日由懷慶拔營追勦

昨經降旨令大營各路進剿官兵統歸勝保調遣復據訥爾經額先後派令托雲保郝光甲烏勒欣泰及孔廣順帶領馬步各隊約六千餘名跟蹤前進現在行抵何處能否與勝保等兵會合尙未奏到我兵尾追已屬落後必須設法催令前進方可遏賊紛竄舒興阿現將觀音堂駐紮之涼莊滿兵五百名派綿洵統帶於初七日由茅津口渡河前進著卽飛催迅速

馳抵勝保軍營以資協剿其孟津渡口仍嚴飭珠克登等實力巡查毋任匪黨偷越至陝西一帶情形喫重該督仍卽暫駐該處相機調度如何撥兵進剿之處著隨時妥速籌辦仍須與晉省聲勢聯絡不可稍涉疏虞所派桂齡帶兵折回聽候調撥之處卽照所議辦理

同日郭夢齡奏言臣接准撫臣行知賊竄垣曲

省南靈石縣韓侯嶺地方險要飭調標太三營  
兵丁並壯勇各五百名前往扼要防勦臣查靈  
石縣韓侯嶺距省三百八十里山勢險要本應  
嚴防前因兩鎮官兵調赴澤蒲一帶防勦餘兵  
無多及聞垣曲警報當卽遴派委員攜帶礮藥  
銀兩馳赴靈石會同該縣及紳士速募壯勇設  
法堵截能否得力尙不可知實緣省城滿綠各

營存兵止一千三百餘名雖經先後募練壯勇二千餘名而城周二十四里防守已形單薄若再調去兵勇一千名愈不足恃查省城鋪戶居民前聞賊匪渡河紛紛遷徙經臣派員反覆開導募練壯勇演習技藝月餘以來人心漸臻靜謐茲聞撫臣欲調出兵勇千名又各驚惶失措現據紳士前鴻臚寺卿賈克慎等十餘人聯名

呈請免調若置紳民於不顧勢必遷避一空省  
城根本重地不能不熟思審處現雖經撫臣添  
調大同鎮兵一千名來省第各營零星湊齊有  
需時日豈可顧彼失此稍誤事機查前往澤州  
防口官兵二千餘名此時無須全留似可酌調  
千名繞赴韓侯嶺堵截較爲妥順現已稟請酌  
辦聽候批示飭遵旣據紳民籲求不敢壅於上

聞合無仰懇

聖恩俯如所請准令撫臣改調以全大局而順人心再  
接據翼城縣知縣葉桂芬馳報探聞初二日垣  
曲失守河東道張錫蕃垣曲縣知縣晏宗望不  
知下落並聞絳縣於初五日失守又據平陽府  
知府何維墀稟稱賊至曲沃縣占踞上西關及  
三里橋等處並焚燒該縣東門等情平陽以南



文報不通各路官兵及撫臣均無信息臣焦急  
實深惟有嚴飭省南州縣設法防堵一面率同  
官紳人等嚴守省垣以保生靈而衛畿輔伏乞  
飭下各路統兵大臣迅速救援奏入

上命軍機大臣傳諭哈芬郭夢齡曰賊匪竄入垣曲旋  
擾曲沃該撫以省南靈石縣韓侯嶺地方險要飭調  
標太三營兵丁並壯勇各五百名前往自係扼要設

防惟太原省城關繫全省大局現在防守亦極緊要  
存省兵勇僅三千餘名自未便再調出省著哈芬於  
調往澤州防口官兵內酌撥一千名繞赴韓侯嶺堵  
截仍將所調大同鎮兵一千名催令迅赴霍州一帶  
駐紮防守現在賊匪占踞曲沃之上西關及三里橋  
等處並焚燒東門急宜迅速剿辦勝保善祿等追剿  
之兵計已趕到哈芬想亦馳赴平陽扼要迎截務須

前後夾攻與各路援兵聲勢聯絡萬不可稍涉延緩  
太原爲畿輔屏蔽該藩司卽督同紳民妥爲布置嚴  
密設防毋令紛紛遷徙尤宜偵緝奸細毋稍疏忽其  
井陘一路已諭令訥爾經額派兵入山接應著卽飛  
催前途進援垣曲絳縣失守文武下落及張錫蕃等  
逃遁情形均著確查叅奏平陽以南道路既有阻隔  
一切文報卽飭繞道行走

上又命軍機大臣傳諭訥爾經額曰本日據郭夢齡奏  
絳縣已於初五日失守賊匪現擾曲沃逼近平陽太  
原省城兵力甚單無可調撥請飭各路重兵星速援  
應等語是晉省曲沃平陽帶情形萬分喫緊雖勝  
保等已由濟源追賊前進該大臣已派馬步隊各兵  
繞道前往但俱從後尾追不能抄出賊前仍恐緩不  
濟急若賊奔竄汾霍之間則太原省城甚屬可慮其

東路直接井陘等處乃畿輔最要關隘前有旨令訥爾經額卽派將弁管帶正定防兵星夜起程由獲鹿山口直抵太原徑趨霍岳卽可迎頭截擊此舉萬不可緩至正定一帶爲畿疆門戶卽著該大臣酌調他處官兵前往防守如此一轉移閒旣可速援晉省而正定要隘防堵仍不稍疏前派帶兵之郝光甲等現已行抵何處著卽飛催速剿

同日張芾奏言南昌城外逆匪在得勝門外迤西暗窰地道經江忠源派楚勇從內迎掘旬日之內破賊地道三處七月十八日以後湖南候補道夏廷樾統帶鎮筸等營官兵六百名湘勇二千餘名陸續到永和門外紮營湖南訓導江忠淑帶楚勇一千名於章江門外紮營二十二三等日復有賊船七十餘隻自下游駛至河干

停泊二十四日我兵分七路進攻總兵音德布  
統帶滇兵直隸州知州朱孫詒帶領湘勇守備  
王坤帶領鎮筸等營兵益以川勇貫勇共二千  
八百名至永和門東北分三路進攻七里街賊  
營賊衆約三四千人拒敵湖南訓導羅澤南帶  
湘勇首先迎擊滇兵繼之鏖戰良久斃賊約三  
百餘名賊衆敗走我兵乘勝追殺直抵賊營賊

皆紛紛上船正擬一面焚船一面燬營賊突從  
左邊山後抄出二千餘人從旁橫擊羅澤南等  
拚死拒戰賊復從右邊營後抄出一千餘人我  
兵力不能支千總楊受春等登時陣亡賊衆乘  
勢撲來經武生楊虎臣帶領湘勇奮力橫截賊  
前將賊擊退斃賊數十人我兵復追至賊營始  
行收隊查點滇兵陣亡三十二名湘勇陣亡八



十一名此沙港三路進攻情形也廣勇與省局  
練勇南昌勇由空心礮臺出隊進攻得勝門外  
賊營賊出數百人拒敵衆勇奮力迎擊賊三進  
三卻被我兵殺斃數十名各勇亦受傷數名知  
府耆齡遊擊祥麟於城上督飭弁兵開礮斃賊  
多名九江等營兵由永和門外湖岸一路進攻  
楚勇辰州撫州兵由章江門外分兩路進攻賊

皆堅伏不出均各撤隊惟滇兵湘勇先後斃賊  
四百餘名而兵勇陣亡五百餘名之多總兵音  
德布係統兵大員都司楊煥章係辦理營務自  
請出城督戰之員雖查無退避情事究未能全  
師而歸均應請

旨暫行革職留任湖南武生楊虎臣於賊衆追撲時奮  
力擊退得以轉敗爲勝應請以把總補用並

賞戴藍翎以示鼓勵陣亡之七品軍功易良幹等均請  
飭部分別議卹二十六日我兵復照原路出隊江忠源  
親身出城督戰察看地勢沮洳路多阻隔擬令  
湘勇移營進逼賊壘以便攻擊二十七日湘勇  
正在紮營賊衆麇至我軍迎擊賊仍退去各練  
勇自空心礮臺出隊誘賊頗有斬獲礮臺開礮  
斃賊尤多而賊壘甚堅終未能乘勝撲取臣惟

有與陳孚恩江忠源熟商攻勦之策以期剋日  
殲除至督糧道鄧仁堃前在南昌府任內籌辦  
守禦精細周備所練壯勇亦極得力洵屬謀勇  
兼全署鹽道王訓駐守得勝門偏近賊營晝夜  
巡查不遺餘力兩次地雷轟城均經協同督兵  
搶護署南昌府知府林福祥熟悉武備身在行  
閒尤爲奮勇均係守城出力尤著之員查豐城

縣失守鄧仁堃係兼轄道員林福祥係不同城  
之知府瑞州府失守王訓係兼轄道員均有應  
得處分該員等皆在圍城之中勢難兼顧究屬  
過不掩功且豐城縣瑞州府旋即收復可否仰  
懇

天恩免其置議再饒州府地居下游恐賊竄擾前經  
臣飭令鄱陽縣知縣沈衍慶帶勇擇要防堵近日

湖水驟漲一片汪洋無險可扼府城多年衝塌  
費鉅未修茲探得賊船數百隻於七月十三日  
自省分竄饒州鄱陽縣知縣沈衍慶樂平縣知  
縣李仁元各帶練勇奮力抵禦同時力盡捐軀  
知府以下各官均無下落除查明沈衍慶等殉  
難確情奏請

賜卹外臣 株守省城未能速籌剿賊以致久不解圍俾

賊竄擾上下游郡縣相繼失守咎無可辭應請  
旨併案從重治罪

同日江忠源奏言粵匪自湖北安徽轉陷江南  
沿途擄掠民船數已逾萬自九江以下江路一  
千數百里賊船往來停泊無敢阻攔江南揚鎮  
等處皆兩面憑江併力攻圍而賊得水陸兼護  
以牽掣兵力故欲克復三城必須肅清江面欲

肅清江面必先製造戰艦以備攻擊臣愚以爲  
宜

飭四川湖北湖南各督撫製備戰船百餘隻以廣東拖  
罟船爲式每船計可載兵五十名並

飭廣東督撫購備洋礮五百斤三百斤重者千餘尊剋  
期三月齊備陸續放至武昌以備調遣此三月  
中如能破賊卽以此項船分布沿江水師各營



爲益實多且賊衆船多縱敗衄遠遁沿江搜捕  
不能不資船隻俟戰船礮位剋日造齊調集閩  
浙廣東水師營兵兼募廣東水勇扼據江險以  
戰則相機衝擊而力有餘以堵則依營據險而  
勢亦壯於勦賊未必無補至造船必擇幹員募  
勇尤資良將臣查湖南候補道夏廷樾通才博  
識遇事虛衷四川嘉定府知府俞文詔年壯才

明勇於任事湖北已革同知勞光泰熟悉工程  
人亦廉幹以上三員若令監督船工必能辦理  
妥速廣西右江道張敬修久歷戎行素號勇敢  
江西署南昌府知府林福祥曉暢軍務辦事勤  
能以上二員均籍隸廣東購礮雇勇皆所熟悉  
宜委令辦理卽飭督率各船徑赴江南以資攻  
勦均奏入

上命軍機大臣傳諭張芾陳孚恩江忠源曰江西守城官兵疊次破賊地道兵勇分路進攻乘勝追殺賊匪從後抄出兵勇陣亡百餘名幸武生楊虎臣帶領湘勇橫截賊前得以轉敗爲勝其餘各路先後出隊誘戰均未得手是南昌城外賊衆尙多並無潰散之勢該省拒守兩月有餘而饒州瑞州又疊次失事吉安贛州一帶土匪復肆行滋擾著張芾與陳孚恩江忠

源督率在事文武員弁迅籌堵剿毋稍疏懈饒州失  
守該府以下各官均無下落著卽查明具奏其鄱陽  
縣知縣沈衍慶樂平縣知縣李仁元力盡捐軀著卽  
查明奏請議卹該撫自請從重治罪之處著暫行存  
記糧道鄧仁堃知府林福祥署鹽道王訓雖有微勞  
惟於所轄府縣均有失事未便卽行免議著一併存  
記均俟軍務告竣再降諭旨江忠源請製造戰船購

備礮位已諭知四川兩湖廣東各督撫辦理其保奏  
各員除已革同知勞光泰毋庸派辦外知府俞文詔  
道員張敬修已諭令裕瑞葉名琛飭知該員等一體  
遵照其夏廷樾林福祥二員現在江西應於何時飭  
往何處監督船工購礮募勇之處著張芾江忠源酌  
量妥辦

上又命軍機大臣傳諭裕瑞張亮基崇綸駱秉章曰賊

匪自攻陷金陵揚鎮三城以來擄掠民船數已逾萬  
我軍攻剿未能得手皆由戰艦無多致令長江天塹  
無所控扼近又攻撲江西省城分擾瑞州豐城饒州  
各州縣逆氛猖獗亟宜設法先清江面前有旨令張  
亮基等購募船廠酌派兵勇順流而下與下游師船  
兩路夾攻想已遵辦惟江路縣長必須廣爲製造著  
裕瑞張亮基崇綸駱秉章等於四川湖廣等處倣照

廣東拖罟船式速卽雇覓工匠共製戰船百餘隻每  
船約載兵五十名均著剋期三月一律齊備以資調  
遣本日已令葉名琛等迅將船隻式樣咨行各該督  
撫查照辦理並備五百斤三百斤礮位千餘尊應用  
矣川省應造船隻或在該省或在湖北宜昌一帶製  
造卽由裕瑞酌量所需經費亦著該督籌款趕緊辦  
理四川嘉定府知府俞文詔熟悉工程著卽飭該員

監造總期妥速堅固爲要至此項船隻成造尙需時  
日前諭湖北湖南兩省購募船隻仍著張亮基等遵  
照辦理儘能與下游艇船併力肅清江面金陵揚州  
先經收復所有新造戰船尙可爲他日江面水師之  
用

上又命軍機大臣傳諭葉名琛柏貴曰逆匪竄擾江南  
長江千里我軍船礮不足以資堵擊前經疊降諭旨



令葉名琛等雇備紅單船隻載礮駛赴江南助勦業  
已前後開行本日復降旨令四川湖南湖北各督撫  
製備戰船百餘隻以廣東拖罟船爲式著葉名琛等  
速將此號船式咨明各該督撫倣照製造卽選派熟  
悉工匠數名令赴湖南北俾資製造並著葉名琛等  
購備洋礮五百斤三百斤重者千餘尊剋期三月解  
至武昌以便配搭船隻分布水師各營爲水陸夾擊

之計又廣西右江道張敬修籍隸廣東購備礮位雇募水勇均所熟悉著葉名琛飛咨勞崇光如該員能前往督率辦理當可得力

上諭內閣曰逆匪圍撲江西省城疊經官軍進剿雖殺賊不少轉敗爲勝究未能迅毀賊巢所有帶兵之雲南總兵音德布督戰之四川都司楊煥章均著革職暫行留任以觀後效其奮勇殺賊之湖南武生楊虎

臣著以把總補用並賞戴藍翎陣亡之湖南七品軍  
功易良幹羅信東羅鎮南均著照從九品陣亡例賜  
卹生員謝朝翰著照訓導陣亡例賜卹雲南千總楊  
受春著照千總陣亡例賜卹該撫仍當督飭鎮將乘  
此大兵雲集將近城一帶賊壘鏟除沿江賊船焚燬  
則上下游分竄之賊自不難立就殲除

欽定剿平粵匪方略卷五十四 癸丑年

八月十三日

乙酉

陸應穀奏言探聞懷慶解圍零

匪西竄擾及濟源該處南路對岸爲孟津澗池新安三縣豫省防守自以上游鞏洛之凶爲最要除孟津渡已由舒興阿派兵駐紮外其汜水渡發澤渡柳園渡蘭儀渡黑堽等處臣已添派兵勇分投防守至新安澗池二處距省較遠已

飛咨舒興阿撥兵分防並札飭署河南府李潔  
酌撥兵勇協同嚴守 臣於巡河時嚴飭各弁晝  
夜梭巡務期認真堵禦不使賊匪偷渡豫省現  
獲奸細訊供賊欲分股由周家口南來接濟八  
月將至汴梁省中人心驚惶紛紛遷徙 臣當卽  
就近折回省城妥爲鎮撫鎮江揚州逆匪時虞  
北竄永城鹿邑之間尙無一兵駐守現在經文

岱王家琳統帶之兵已陸續抵省冒暑奔馳數  
月半多疾病臣當飭令帶兵各弁查明有疾疲  
弱者先遣歸伍以節糜費擇其精銳可用者酌  
留千餘名分別派往至經文岱本係奉

旨調赴直隸防堵前因豫省被賊竄擾攻勦喫緊經臣  
奏留此時南路地方肅清應否仍令前赴直隸  
防堵請

旨遵行奏入

上命軍機大臣傳諭陸應穀曰逆匪由懷慶竄入晉境沿河一帶地方自應嚴密防範所有汜水等處各渡口該撫已添派兵勇防守並著嚴飭各地方文武晝夜巡查毋任偷渡豫省現獲奸細訊有賊欲分股前來汴梁之說雖不必遽信爲真亦不可不豫爲防備該撫現擬折回省城務當鎮定人心毋令驚惶遷徙

王家琳等所帶各兵准其裁汰疲弱選擇精銳千名  
派往永城駐紮以堵賊匪北竄之路該撫仍當隨時  
密加偵探何路緊急卽應親往督辦切勿株守省垣  
致誤事機經文岱本交訥爾經額差遣委用今已勦  
匪回省著卽飭令前赴訥爾經額行營聽候差委

同日哈芬奏言探聞八月初一日千總傅輝盤  
獲垣曲縣內應賊匪五十名知縣晏宗望認爲



難民一概釋放初二日晚間縣城火起賊由隘  
口夾攻並聞文武員弁有先行逃走者縣城遽  
爾失守查垣曲以內各路無兵亦無險要絳縣  
聞喜一帶在在堪虞雖有總兵郝光甲烏勒欣  
泰帶兵追襲未能撓擊懇

飭諭爾經額舒興阿速卽派兵會合撓勤庶可不至蔓  
延臣又聞潞安一帶有賊匪翻山偷越欲襲取

各州縣臣當卽往查行抵高平該縣知縣劉熙  
敬已盤獲僞軍師張維藩賊犯任學體河南孟  
縣帶路民人許完偏等三犯訊稱張維藩帶領  
賊匪八百名已入山西者尙屬無多先令許完  
偏帶路陸續偷入定於八月初九日襲取長子  
縣城如有準備卽回大名等供當將各犯正法  
隨調撥潞安府弁兵嚴密搜捕臣赴潞安面諭

紳士集團布置後卽帶兵赴平陽府與總兵烏  
勒欣泰相機進剿至河東鹽法道張錫蕃監掣  
同知魯鴻疇垣曲縣知縣晏宗望署參將玉恆  
均無下落俟查明何人逃走分別嚴叅治罪並  
請將臣交部嚴加議處奏入

上命軍機大臣傳諭哈芬曰現在逆匪已由垣曲絳縣  
竄踞曲沃之上西關及三里橋等處勢甚剽急昨有

旨諭令該撫馳赴平陽扼要迎截此時勝保善祿等  
追剿之兵諒已趕到請爾經額先後派令副都統托  
雲保總兵郝光甲烏勒欣泰及副將孔廣順帶領馬  
步各隊約六千餘名跟蹤前進並舒興阿將觀音堂  
駐紮之涼莊滿兵五百名派副都統綿洵統帶由茅  
津渡河前進兵力足資剿辦該撫諒已馳抵平陽著  
卽督飭總兵烏勒欣泰扼要堵剿並飛催各路官兵

四面堦圍以爲一鼓殲除之計該撫前派張錫蕃等  
防守要隘何以賊至並未接仗遽爾失守卽訊因賊  
匪假作難民內應何以該員等平時漫無偵察臨時  
又任聽該縣晏宗望誤認釋放顯係事後捏詞掩飾  
其畏葸逃避之罪此等庸劣貽誤員弁必應按律嚴  
懲著該撫迅卽查明據實定擬具奏不准稍有回護  
至監掣同知魯鴻疇前據郭夢齡奏稱垣曲失守係

接該員稟報何以該撫處並未稟知著一併確查具  
奏

上又命軍機大臣傳諭訥爾經額曰哈芬奏盤獲逆賊  
爲軍師張維藩等訊供有帶賊八百名陸續入山西  
境定於八月初九日襲取長子縣如有準備卽回大  
名等語此等奸細所供雖未盡確亦不可不嚴密防  
備且直隸與山西接壤當此賊蹤肆擾難保無土匪

乘間竊發潛相勾結卽如七月間唐縣等處匪徒嘯聚僅捕獲夥犯七名若不實力查拏必至釀成巨患著訥爾經額督飭各該地方官密速搜捕毋任竄逸其大名府屬如有山西竄回匪黨並著嚴緝懲治以杜奸萌

上諭內閣曰逆匪自懷慶敗逃西竄疊經諭令哈芬嚴防隘口茲據奏稱逆匪於八月初二日竄至垣曲縣

城遽爾失守該撫所派防守地方文武所司何事哈  
芬著卽革職留任河東鹽法道張錫蕃監掣同知魯  
鴻疇垣曲縣知縣晏宗望署參將玉恒均著先行革  
職著哈芬查明該員等如有避賊先逃情事卽行嚴  
叅按律懲辦現在勝保善祿等已統重兵跟蹤追擊  
復經訥爾經額派令副都統托雲保總兵郝光甲等  
帶領馬步各隊分路進攻該撫卽會同各路官兵迅



速鞫辦毋稍延誤致干重罪

同日慧成奏言臣於八月初五日行次清江浦  
連接琦善咨稱揚州東路兵勇數已逾萬添兵  
尙可從緩皖省情形萬分喫緊應徑調副都統  
常清速帶馬隊一千名馳往和州等處防堵現  
又據淮徐道稟稱賊匪已至廬州府屬之運漕  
鎮並有賊船駛入黃落河餘船停泊裕溪口欲

由巢湖攻撲廬州又據安慶府知府稟稱賊匪竄至太湖由黃泥岡用木箠駛至大江傳言亦由此處同赴廬州等情應再添調臣所帶直隸宣化鎮兵五百名赴和州一帶應援伏思賊匪竄擾廬巢明係窺破皖省兵單仍以避實擊虛爲牽掣揚州之計若不厚集兵力迅速掩擊誠恐緩不濟急復成北竄之勢關係非小必須臣

親自督兵前往方覺放心因飛飭副都統常清  
管帶馬隊兵一千名參將蘇勒芳阿管帶宣化  
鎮兵五百名參將松林管帶陝西兵四百五十  
名分起前往和州一帶會同李嘉端相機迎剿  
以遏賊衝如沿途偵探賊勢衆多臣卽於附近  
處所酌調官兵以資截擊臣拜摺後卽行督兵  
馳往奏入

上命軍機大臣傳諭琦善慧成曰賊匪竄至廬州運漕  
鎮並有賊船欲由巢湖等處攻撲廬州皖省兵單不  
可不嚴加防堵慧成著卽帶兵馳赴和州一帶會同  
李嘉端迅籌進剿以遏賊匪北竄之路其揚州東北  
一帶勇多兵少著琦善統籌全局於奕經容照所帶  
官兵內酌量調撥前往協剿毋令賊匪乘虛竄逸

十四日

丙戌

郭夢齡奏言接據洪洞縣知縣鄭翰

集賢堂 卷之三十四 九  
馳報初十日賊匪在平陽府東西南三門放火  
攻城洪洞相距六十里百姓均皆逃散情勢危  
急臣接閱之下焦灼萬狀伏查撫臣於前月二  
十八日在澤州壘接緊報延住數日之久並未  
迅由陽城沁水直抵翼城迎赴曲沃截擊直至  
初六日始由澤州起程取道潞安沁州繞赴平  
遙縣再往韓侯嶺迎勦難免落後太原鎮臣烏

勒欣秦前報初三日自澤州攔車鎮起身前赴  
平陽防勦相距四百餘里迄今亦未據報到勝  
保郝光甲兩路官兵亦不知行抵何處如果賊  
由平陽再往北竄則洪洞趙城霍州等迤北州  
縣兵勇十分單弱竟有難以保全之勢省城現  
存兵勇斷難分派前往已稟催撫臣兼程前進  
迎頭堵勦務截北竄之路現在賊蹤愈近勢必

北來省垣關繫緊要合無仰懇

聖恩在附近防兵內飭調二三千名星夜來晉會同迎  
勦庶無北竄之慮奏入

上命軍機大臣傳諭郭夢齡曰賊匪已在平陽府放火  
攻城勝保善祿西凌阿等帶兵追勦計此時亦可趕  
到訥爾經額先後派托雲保等帶領馬步各隊官兵  
六千餘名分路追擊又諭令派兵由正定入井陘山

口爲太原後路應援卽可向前路迎勦本日復諭令  
勝保等及哈芬烏勒欣泰星速馳赴平陽指日大兵  
雲集合力攻勦此股賊匪無難速就殲除省城防守  
關繫緊要該藩司惟當督率文武員弁及紳民人等  
嚴密巡緝總以鎮定人心爲要其霍州要隘仍須設  
法飭令地方文武紳民厚集練勇力扼賊衝萬不可  
聞警紛紛逃散轉遭搶掠洪洞趙城一帶情形如何



隨時具奏

上又命軍機大臣傳諭哈芬曰據郭夢齡奏初十日賊匪已在平陽府東西南三門放火攻城洪洞相距六  
十里百姓均皆逃散平陽府城存兵僅二百餘名當  
此賊勢猖獗兵力實形單弱該撫於初六日始由澤  
州起程取道潞安繞赴平遙再往韓侯嶺迎勦烏勒  
欣泰於初三日自澤州攔車鎮起身距平陽僅四百

餘里尙未趕到似此行走迂緩必致貽誤事機平陽  
爲省城屏障設有疏失則汾霍一帶在在堪虞該撫  
身任封疆自問當得何罪烏勒欣泰現在行抵何處  
該撫卽傳旨該鎮儒再延誤軍法具在決不姑寬平  
陽以南道路阻隔一切文報軍餉務須設法繞道行  
走毋致遲誤

上又命軍機大臣傳諭勝保善祿西凌阿日前因賊竄

山西勝保等跟蹤追擊諭令迅速剿滅現在平陽府城被圍守兵僅二百餘名極爲單弱總兵烏勒欣泰自澤州攔車鎮前赴平陽至今未到哈芬帶兵無多赴援亦甚迂緩恐係聞賊勢剽急遷延不進若平陽稍有疏失關繫匪輕且平陽迤北霍州韓侯嶺一帶險隘現俱無兵扼守踰嶺而北則太原省城正當其衝若任賊突過霍州由太原直下井陘踞險內竄勢

將何所底止前已諭令誦爾經額迅派正定官兵馳  
入山口趕緊前進以爲太原後路援應卽可前往霍  
州扼要迎擊連日未見勝保等奏報追賊行抵何處  
殊深懸念賊匪冒險深入利在速奔乘我不備勝保  
善祿西凌阿等務須帶兵疾馳使賊無暇喘息勦辦  
方可得手誦爾經額所派各路援兵並著飛催前進  
尤須設法繞出賊前此係最要機關不可稍緩澤潞

山徑可通太原之路勝保等諒已探明卽派奇兵繞道間出扼定霍嶺前後夾擊此股逃匪當不難迅速殄滅也前有旨各路進剿官兵均准勝保調遣務當統籌全局相機督剿如有不遵調遣畏葸貽誤者卽著嚴叅以軍法懲辦並將剿賊情形隨時奏報以慰廑念

上又命軍機大臣傳諭訥爾經額曰前曾屢次諭令訥

爾經額派正定官兵迅由獲鹿井陘一帶入山赴援  
原因賊匪由豫竄晉甚爲剽急我軍尾追落後自平  
陽至太原省城兵力俱形單弱若不於前路迎頭力  
扼賊衝賊勢何所底止本日據郭夢齡奏賊匪於初  
十日巳刻已在平陽府東西南三門放火攻城各路  
援兵尙未趕到請於附近防兵飭調二三千名星夜  
來晉等語平陽爲太原南路保障若有疏虞不但太

原等處被其滋擾卽畿輔亦恐震動著訥爾經額遵  
照前旨卽撥正定官兵數千名星速入山赴援並著  
揀派曾經行陣得力將弁管帶前進直趨太原以南  
至霍山靈石韓侯嶺一帶險要地方駐紮堵賊北竄  
太原之路並可沿途偵探賊蹤迎頭截擊其獲鹿井  
陘一帶爲山西直隸交界要路山徑險峻著卽調撥  
重兵移遠就近扼要防守現在懷慶附近地方仍應

嚴密扼守其臨洺關等處防兵及盛京吉林各兵均可酌量移撥正定一帶以資守禦晉省賊匪一日不除近畿各處一日不能安堵訥爾經額身爲統帥責無旁貸畛域之見不可稍存尤不可以殘賊視之稍涉大意致誤事機

上又命軍機大臣傳諭舒興阿曰前因賊竄垣境該督駐紮陝州派綿洵帶兵渡河協剿現在賊已擾及平



陽該省存兵無多各路進剿之兵均已落後本日已諭令勝保等督兵迅速前進著該督仍飛催前派之兵星夜遄行毋稍遲滯山陝交界地方尤宜嚴防卽酌量緩急妥籌辦理鳳邠道文海已調補山西河東鹽法道著卽飭令速赴新任賊雖竄入晉省幸河東鹽池一帶地方現尙未遭蹂躪該員及早到任並可督率團練綜覈經費爲我軍後路接濟於山陝交界

地方亦可聯絡

同日刑部尙書許乃普奏言自逆匪竄踞金陵  
鎮江揚州將及半載尙未收復總由江鎮兩郡  
濱臨大江官兵但能攻其東南不能四面兜剿  
揚州雖距江四十里而有濱江之瓜州爲賊盤  
踞賊船往來南北岸聯絡聲勢接濟糧食現調  
水師船隻又非素經練習或運掉不靈無以爲

陸路官兵之助臣聞廣東內河外海各廳縣均有捐造緝捕快蟹船各營亦有捐造爲數不少該省沿江沿海緝捕盜匪悉藉其力查快蟹船形如蜈蚣上無篷窗利於用武船頭暗藏大礮旁列子母礮船外護以魚網槍礮遇網卽墮不能擊中船身網外仍遮護藤牌船身極低大者百餘槳其行如飛橫風對風皆可駕駛其船勇

皆係各廳縣雇募技藝嫻熟洵爲水戰第一船  
中器械均由該廳縣捐辦現成無須另行籌款  
此項船隻果能調至江南勦賊必可得力可否  
請

旨密飭廣東督撫臣酌調廣東水師官兵派委鎮將大  
員管帶快蟹船二三十隻迅由海道馳赴江南  
於吳淞口取齊駛入長江合力圍勦俾該逆猝

不及防定可與陸軍夾擊制勝剋期掃滅再聞  
廣東軍功五品頂戴梁恩升千總王耀吉已革  
千總陳高守備衛佐邦均係水陸捕盜得力之  
員於粵匪蹤跡伎倆最爲熟悉可否

飭下該督撫令卽隨同水師乘駕快蟹船前往江南助  
剿奏入

上命軍機大臣傳諭葉名琛柏貴曰據許乃普奏聞廣

東內河外海各廳縣均有捐造緝捕快蟹船船勇技藝嫻熟洵爲水戰第一器械均由該廳縣捐辦現成無須另行籌辦各等語現在江南勦辦賊匪此等船隻是否能由大洋入江著葉名琛柏貴體察情形如果此船可期得力著卽派委得力員弁管帶二三十隻迅由海道馳赴江南駛入長江合力圍勦並著派軍功五品頂戴梁恩升千總王耀吉已革千總陳高

守備衛佐邦隨同水師乘駕快蟹船前往江南聽候  
調遣

十六日戊子哈芬奏言臣探聞本月初五初六等

日絳縣曲沃兩處縣城失守皆因兵在賊後使  
賊得以長驅現在直隸之兵未知曾否由濟源  
後路追勦郝光甲烏勒欣泰之兵俱在翼城之  
東尾追較遠寇入日深臣僅帶兵一百名實難

迎勦惟有懇

恩飭催勝保之兵迅卽追擊並飛調郝光甲烏勒欣泰  
之兵與臣會勦再絳縣知縣潘名魁曲沃縣知  
縣丁瓚均無下落仍請

旨將臣一併交部嚴議至同知魯鴻疇前經臣委赴垣  
曲隘口防堵甫聞賊至卽便退回應請

旨革職拏問訊明嚴叅署參將玉恆飭委帶兵前赴垣



曲防勦當賊匪竄入時臨陣退縮應請

旨革職拏問審明後卽行正法奏入

上命軍機大臣傳諭郭夢齡曰逆匪由懷慶竄入山西  
境內連陷城邑直徧平陽已明降諭旨將哈芬革職  
拏問解京治罪並命郭夢齡署理山西巡撫矣郭夢  
齡前奏省城防守事宜已嚴督文武官紳趕緊布置  
此時當已周妥賊攻平陽又已數日現在守禦情形

何如澤潞進追之兵業經遲誤其勝保等兩路一由封門山入口一由濟源縣沿河追勦均係緊躡賊蹤此時是否已抵平陽日內未見奏報或因南路文報梗阻該署撫卽速探明具奏以慰廑念平陽迤北一路平衍除韓侯嶺外別無可扼之險省城存兵誠無可撥他處有無可以移緩就急之處卽著迅籌緩急調往堵截並飭所派委員曉諭該處紳民集勇嚴扼

萬不可任賊竄越前論請爾經額派撥正定官兵由  
獲鹿井陘入山赴援著卽飛催前進儘能趕到霍嶺  
扼要夾擊勦辦當可得力山西巡撫兼任提督通省  
營伍皆歸節制應如何布置卽著嚴催迅撥如查有  
不遵調遣畏葸避賊及地方官吏聞警先逃者均著  
按律以軍法從事不可稍事姑息其郝光甲烏勒欣  
泰之兵亦卽加緊催督以爲夾擊之計不可聽其沿

途逗留又蹈哈芬故轍烏勒欣泰係本省總兵已降  
旨革職留任摘頂示懲若再藉詞耽延貽誤卽著嚴  
叅重治其罪

上又命軍機大臣傳諭勝保曰昨聞曲沃失守賊圍平  
陽已諭令勝保等帶兵疾馳赴援諒已星速前進惟  
連日未據奏報不知行抵何處是否與賊接仗實深  
懸繫平陽關繫晉省大局豈可稍有疏失現在各路

進剿官兵俱准勝保調度著卽統籌全局飛咨各路帶兵員弁前進有緊追賊後者更須有抄出賊前者必使該逆腹背受敵方可悉數殲擒其霍州要隘係由平陽通太原之路必須設法派兵繞道扼守方爲上策想勝保定能酌量調度也

上又命軍機大臣傳諭桂良曰賊匪圍攻平陽晉省固關等處皆與畿輔毗連關係甚重昨有旨令誦爾經

額撥兵由獲鹿一帶進剿以爲太原應援惟直隸與山西錯壤處所甚多不可不豫爲防備訥爾經額遠在清化鎮誠恐未能兼顧桂良駐紮保定著卽於交界地方妥籌堵禦督飭文武官弁嚴密布置總以查拏奸細鎮定人心爲要

諭內閣曰前因賊擾懷慶密邇山西疊次諭令哈芬嚴密防堵該撫前奏布置隘口情形據稱已屬周密

乃賊匪突陷垣曲擾及絳縣曲沃直撲平陽壘據藩  
司郭夢齡馳奏而哈芬近在省南奏報轉遲且由陽  
城親帶官兵進剿自應迅赴平陽迎擊何以遷延旬  
日尙逗留潞郡本日始據奏到絳縣曲沃失守於賊  
擾平陽府城情形茫無聞知該撫統轄全省不知所  
司何事卽如同知魯鴻疇稟探垣曲賊情郭夢齡據  
以入告哈芬並未接閱是文員之不遵調度可知烏

勒欣泰係本省總兵例歸巡撫節制何至屢催罔應  
尙須請旨飛調是武職之不遵調度可知似此調度  
乖方畏葸無能若仍令待罪封疆必致更滋貽誤哈  
芬著卽革職拏問由郭夢齡派員解京交刑部按律  
治罪山西巡撫著恆春補授卽行馳驛前往未到任  
以前著郭夢齡署理山西布政使著太原府知府吉  
祥暫行護理烏勒欣泰係太原鎮總兵值此賊氛偏



近平陽不知星速往勦節節耽延殊屬可惡惟正當帶兵需人之際未便令其置身事外烏勒欣泰著卽革職暫留本任仍摘去頂戴責令帶兵趕緊前進扼要截擊如再藉詞觀望卽著該署撫嚴叅治罪河東道張錫蕃垣曲縣知縣晏宗望監掣同知魯鴻疇署叅將玉恆前經降旨均著革職交哈芬查辦茲據哈芬奏叅僅將魯鴻疇玉恆二員逃避退縮情形請旨

拏問嚴訊亦未允當張錫蕃晏宗望魯鴻疇玉恆著  
與絳縣知縣潘名魁曲沃縣知縣丁璜一併革職拏  
問交郭夢齡嚴行審訊如係避賊先逃棄城不守卽  
於訊明後奏請按律正法以肅軍令現在進剿之各  
路官兵前已有旨俱准勝保調度著卽申明紀律嚴  
定賞罰迅掃賊氛以副委任

上又諭內閣曰前以賊竄豫省大兵會剿特命訥爾經

額爲欽差大臣各路官兵統歸節制追賊圍懷慶朕以該郡與晉省接壤屢經降旨令該大臣派兵分路嚴防杜其西竄諄諄訓示至再至三訥爾經額身爲統帥自應通籌全局嚴密堵截乃懷慶之圍甫解而賊匪竟由西路竄入晉境由垣曲絳縣曲沃擾及平陽雖經勝保等跟蹤追勦訥爾經額派撥官兵先後援應而該大臣調度布置未能周密實難辭咎現已

將巡撫哈芬革職拏問治罪訥爾經額著卽褫去黃馬褂以示薄懲仍著懷遵前旨嚴飭援兵迅速前進並飭繞出賊前扼要攻截痛加勦洗務將賊匪殲滅無遺儘再延緩致令紛竄滋蔓惟該大臣是問

同日陝西固原提督桂明奏言臣探聞逆匪竄擾山西正在督辦防勦適准陝西撫臣張祥河來咨令臣帶兵渡河馳赴蒲州以上一帶勦賊

伏思 臣 遵

旨辦理陝省防堵奏明酌撥陝甘官兵四千七百餘名  
分防要隘今逆匪將至陝境沿河一帶延袤二  
百八十餘里緊要渡口計有五處共分駐官兵  
一千九百餘名又潼關駐守官兵一千三百餘  
名其餘要隘紛繁每處駐兵數十名或百名以  
至二三百名不等兵力尙形單薄各原營存兵

無多難以再調 臣若帶兵渡河前往山西攻勦  
誠恐有顧彼失此之虞况黃河天塹正宜扼險  
以遏賊匪西竄之路若督兵過河背水一戰致  
令沿河一帶空虛深爲可慮似未若防守天險  
可期萬全至於沿河船隻已俱蔽收庶免搶解  
越渡奏入

上命軍機大臣傳諭舒興阿桂明日桂明奏陝省防勦

緊急兵力單薄不能帶兵前往山西自係實在情形  
現在賊圍平陽該處距陝不遠潼關大慶關等處及  
沿河一帶均關緊要業經該提督於各要隘分駐官  
兵務當嚴密防守實力巡查至所稱撤收沿河船隻  
以免搶船偷越等語著卽嚴飭地方官認真辦理勿  
稍疏懈目下晉省情形喫重儻山陝交界處所賊蹤  
已遠該督等仍當酌度緩急以爲鄰省援應毋失事

機